

六藝之一錄

四四

欽定四庫全書

六藝之一錄卷九十七

錢塘倪濤撰

石刻文字七十三

宋刻題名

宋陳從古題名

右不知所刻處其語云至和二年歲次乙未夏六月

下旬休新釀抵熟佳果探成清泉可漱芳樹堪倚郡

守陳從古率通判王希顏邑令孫奕台幙陳確從事

趙頴杜仁壽會于岩石之上醉書以記共六十六字
楷法精妙予每愛之俟詳考以訂其所在

立牘記

瑯琊山題名

右簡翁藏瑯琊山諸賢題名一帙內有云治平二年
秋八月癸卯哉生魄伯兄子美與余挈幼子世偉為
瑯邪之遊觀月于曉光亭宿了了堂詰朝西觀瑯邪
洞飲寒泉并煮茶而還又明日往觀廣照上人之塔
由南嶺路以歸自初及今至山者三而未有如茲遊

之勝且悉也滁人雍成之為客長老僧繼詮在行責
授滁州團練副使錢公輔題又後書云甲辰仲兄子
玉續至余曩讀滁志恨不載諸聞人題名今觀此哀
然巨函既已快古迹之未湮而讀之至此又如身在
千岩萬壑中者然則古人謂游名山飛鴻踏雪題名
只如雪後指爪者豈真無所見哉

立牘
記

董元康題名

長清董元康權宰奉高挈家遊瑤池館觀元功弟題

字愴然久之政和四年七月二十一日質贄侍行

右小石刻在岱嶽觀予既錄唐碑往還數四道士
謂予曰昨發地得石刻二請觀之其文亦可采因
附焉下題因此

盛勛題名

政和戊戌仲夏二十九日被旨決獄恭謁祠下飭此
轉運判官盛勛公達題男志修侍行

右小石刻在岱嶽觀戊戌乃政和八年其年十一

月己酉朔改元重和曰決獄者讞而決之古無仲

夏斬決之事也

求古錄

范致君題名

武夷范致君久慕仙風自楚之魯遂登泰山以望八極之表有宋大觀元年正月廿三日記於是碑

右小石刻在泰山南麓后土廟

求古錄

錢伯言題名

宣和己亥九月廿四日面奉玉音至奉符催視嶽祠

後一月伯言至自究明日具香燭以告上旨而罷醮
於會真宮獨登瑞雲亭早飯于行館遂同令寇庠丞
呂光問祠官曹欽承萊蕪令韓僖道士蘇彥弼謁岱
嶽觀留連祠上復自金母洞過青帝觀觀文僖丞相
遺刺遂游白龍潭奠御苑玉芽於水中愛其泉石之
勝迺相與策杖散步還過雞籠峯始復有輿躬走社
首山視禪壇訪遺迹晚入乾元觀小飲翠陰亭而歸
知襲慶軍府事錢伯言題

右碑舊在宋天書觀後人移之州城內嶽廟中西

墀古松下行書大徑寸餘

求古錄

白龍池宋人題名

內供奉官李舜舉被命禱祀帝岳奉香勝槩於壽聖
節日先款青帝宮次詢白龍潭治平四年題

下云書吏李恭從行益此字即恭之字

兗守劉兗奉詔祈雪于岱宗登絕頂翌日謁白龍池
之祠元祐丁卯孟春初四日奉符令林會題

大字

貫道建欄干此以便遊者元祐丁卯正月八日

大字

元符庚辰七月晦趙習之徐安國弟居仁孫正仲同遊

大字

范陽正輔再遊同魯國景元符丁丑三月廿六日

皇甫偁徐端朝孫憐同遊建中靖國元年三月

缺

日題

奉符令李珪因捕蝗恭謁白龍祠男彙侍行崇寧壬

午孟春初七日誠中君實德升崇寧二年八月廿六

日自王母池來訪此

董元康政和甲午重九日攜家來遊質贄賁侍

自恭觀元康兄留字正和乙未孟冬二十日

莆陽陳國瑞子玉恭謁白龍祠池俯洞酌泉小憩而

邁政和丁酉夏前二日

大字

姜子正子方李晉道劉言可刁文叔同來庚子四月

李顯道張公美王仲與張去塵庚子孟夏十九日遊

池上

鄆城李儋弟俊姪贛隨侍遊此癸卯孟春廿八日

張子觀水于池十三年春三月 篆書大字無年號
按宋朝紀年無有至十三年若曰金元又不合一代
全無題名止此一人也

右在嶽西傲來峯下白龍池壁上平廣計二十餘
丈書曰龍潭曰白龍池並大字其傍皆宋人題名
尚未刊缺錄之得十五首其文畧無重複自治平
迄宣和六十年間人名字亦可以想見當日太平
之盛而金元以降洊遭兵火而名山輿區委之榛

莽無復有題名者矣 張子觀水于池篆書張字
作𢇛按劉原父𢇛仲叵銘釋𢇛為張以為張仲之
器歐陽永叔從之趙明誠金石錄疑之黃長睿東
觀餘論則云𢇛其勿反非張字考之王篇信然此
云𢇛子則為張子無疑蓋宋人之好奇者據原父
永叔所定之字而用之耳

求古
錄

靈巖寺王淵題名

方渠王淵幾道緣職事訪如師和尚徧觀靈巖勝迹

當日迴歷下

宣和己巳六月十二日書

北嶽廟蘇軾題名

蘇軾禱雨嶽祠同李之儀李士龍郭長卿孫敏行

缺

賈溫之

右小石刻舊在嶽廟今移縣治賓館又有子瞻書
詞歸去來兮一闋清夜無塵一闋九十日春一闋
用石二片兩面書之舊在縣西北二里水竇巖今

移岳廟皆大字 其詞見蘇文忠公集中

求古錄

晉祠宋人題名

熙寧戊申歲秋九月十四日范陽盧大雅君美臨川
王安禮和甫清源王本安國同謁晉祠舍均福堂明
日如白雲石甕宿明仙又明日遊甘泉開化而歸本

題

本字从木从十

太原王安修世長廣平程易先之安陽蔣畋渭公熙

寧癸丑孟夏同遊

龍圖閣學士河東經畧安撫使曾布提點刑獄朝奉
大夫范子諒躬率寮吏禱雨祠下通判太原軍府事
田盛高復簽書河東節度判官盧訥知陽曲縣馮忱
之走馬承受王演檢法官史辨從行元祐丙寅歲七
月十三日訥謹題 判者任貺開封苗仲淵師顏自
湖南提刑移本路政和五年十月晦祇見祠下男丕
侍

王安禮題名

臨川王安禮赴官太原過謁祠下因與錢塘楊世昌
河南張仲咨會於泉亭熙寧戊申三月十四日題

右題名在太原縣晉祠御書碑陰其碑為晉祠之
銘并序唐貞觀二十一年太宗御製并書其文世

多有不錄獨碑陰字體不一其上右方云司徒太
子太師上柱國趙國公臣無忌太子太保上柱國
宋國公臣瑀特進太子詹事兼衛率上柱國英國
公臣勣光祿大夫刑部尚書上柱國鄖國公臣張

亮禮部尚書上柱國江夏郡王臣道宗太常卿駙
馬都尉柱國安德郡公臣楊師道正議大夫守中
書令太子左庶子兼攝吏部尚書護軍臣馬周凡
七行則當日題者今世流傳摹拓本無此不為完
碑其餘則皆宋人續題錯亂無次其空處又有洪
武二年行省參知政事楊憲題而絕無一唐人題
者以御書之碑無敢擅刺者故也今入錄者四條

宋古
錄